



芝峯集

堯

~ 16
2433
3





門
號 2433
卷 9-3

芝峯先生集卷之八



安南國使臣唱和問答錄丁酉冬赴京時

贈安南國使臣二首

萬里來從瘴癘鄉
遠憑重譯謁君王
提封漢代新銅柱
貢獻周家舊越裳
山出異形饒象骨
地蒸靈氣產龍香
即今中國逢神聖
千載風恬海不揚
聞君家在九真居
水驛山程萬里餘
休道衣冠殊制度
却將文字共詩書
來因獻雉通蠻徼
貢為包茅覲象輿
回首炎州歸路遠
有誰重作指南車

肅次芝峯使公韻

安南使臣馮克寬

異域同歸禮義鄉喜逢今日共來三越朝接武殷
冠皞觀國瞻光舜冕裳宴饗在庭沾帝澤歸來滿
袖惹天香唯君子識真君子幸得詩中一表揚
義安何地不安居禮接誠交樂有餘彼世雖殊山
海域淵源同一聖賢書交鄰便是信為本進德深
惟敬作輿記取使軺回國日東南五色望雲車

重贈安南使臣疊前韻

我居東國子南鄉文軌由來共百王奉使喜觀周禮
樂趨班榮厠漢冠裳雲移殿陛迷仙仗烟轟宮燼識
御香同沐 聖恩瞻盛事強拈詩筆借揄揚

辛苦梯航走 帝居越中歸路一年餘相逢海外難
逢客得見人間未見書戀館旅懷無竹葉瘴江行李
不藍輿君還正值春風早梅嶺清香想滿車

肅和再次海東芝峯使公前韻

馮克寬

居鄉必擇魯鄒鄉講道同師孔素王學海浚源淵
浩浩筆花生彩色裳裳詩囊金玉珠璣寶藥籠參
苓朮桂香公我迭為賓與主儘東南羨任稱揚
往往來來閱日居客中二十又旬餘衛身健僕惟
長劍交臂良朋有古書迎至禮行胥鼓舞生陽氣
復已權輿途長馬快遄歸早任重方知是大車

又贈安南使臣疊前韻

廣南窮處是炎鄉傳譯來賓閱幾王從古山川銅作
界至今風俗卉為裳將軍石室黃茅瘴仙客金爐白
線香安南四海一家肝膽照對君眉宇喜清揚

黃髮翩翩別舊居朝天年到者稀餘詩成上國千秋

節使臣有聖節恩荷重霄一札書朝廷竟不准封

節慶賀詩集故云猶動色相賀行萬里衣冠登玉陛五雲宮闕侍金輿壽

星他日回南極光彩分明照使車

喜得海東芝峯使公詩序謹再次韻以表同

便大筆手澤者

馮克寬

氣孕山奇水秀鄉多公瓌俊邁揚王明于刑五種

吾德展厥材多製彼裳泛海輕槎牛斗耀襲人和

氣麝檀香詩傳增重雞林價從此聲名大播揚

少同孟氏接鄰居年壯而行學力餘佐主都從身

道德澤民全是腹詩書中華路入輕乘駟碩果春

來喜得輿貢了言還敬四牡海邦早早望回車

贈安南使臣又疊前韻

交趾風煙別一鄉曾將白雉獻周王身過越嶺初驚

雪足涉燕都幾裂裳翡翠巢邊盧橘熟桂林叢裏臘

梅香應知歸路堪乘興南望悠然意自揚

芝華集卷之五
識面寧嫌異域居心期傾盡竹未談餘犀珠舊認蕃方
貨風俗曾傳地誌書南極老人朝 聖主北京長路
任征輿見君疑是磻溪叟倘遇周文載後車

再次韻敬答海東芝峯大手筆

馮克寬

起身鄉相自問鄉奉國書來朝聘王執贄將誠通
輦篚轉寒回暖襲氈清光幸接龍顏秀芬馥濃
含雞舌香道我東南文獻域 高皇御製尚褒揚
遠來異趣近同居會上從容談笑餘共對九霄千
里月恭承一札十行書人才氣化關風土封域山
川括地輿歸國僚朋如見問今天下統已同車

贈安南使臣排律十韻

聞道交南俗民居瘴海堦恩綸新雨露封壤舊山川
界割群蠻表風連百越偏時清呈瑞雉水毒跼飛鳥
象自村童馭香隨賈客舡沙邊饒蟻弩淵底吐蛟涎
地氣先春暖梅花未臘妍貢馮重譯舌家養八蚕眠
彩畫周王會銅標漢史編逢君還作別相憶五溪烟

肅次芝峯使公長律十韻

馮克寬

極判洪濛氣區分上下堦東西南北界淮海濟河
川越奠居初定天中正不偏周林驅虎豹虞教樂
魚鳶閭巷開書塾旗亭賣酒缸雨晴添象跡風暖

送龍涎舍忍強為勝摘文巧弄妍萬花爭秀叢群
動任安眠王道車書共 皇朝志紀編詩成聊使
寫霞燦海雲烟

安南使臣萬壽 聖節慶賀詩集序

夫天地有精英清淑之氣或鍾于物或鍾于人故氣
之所鍾扶輿磅礴必生瓌奇秀異之材不專乎近而
在乎遠不稟于物則在于人焉吾聞交州南極也多
珠璣金玉琳琅象犀之奇寶是固精英清淑之氣特
鍾于彼而宜有異人者出於其間豈獨奇寶乎哉今
使臣馮公皓然其髮矍然其形年七十而顏尚韶譚

重三而足不重觀禮明庭利賓王國其所著萬壽慶
賀詩三十一篇揄揚敘述詞意渾厚足以唾珠璣而
聲金玉亦豈所謂異人者哉噫 大明中天 聖人
御極惠懷四溟威怛九裔巍巍蕩蕩軼周家之盛宜
乎白雉呈祥黃耆嚮德今子之來抑未知天果無烈
風海果不揚波如曩日成周時否耶若然則吾子即
古之黃耆而斯詩之作祥於獻雉遠矣古有太史氏
採風謠以絃歌之又安知吾子之詞不編於樂官而
彰中國萬世之盛也歟不佞生在東方得接子之話
觀子之詞恍然飈車雲馭神遊火海之鄉足涉銅柱

之境幸亦大矣其敢以不文辭是為序

後

安南國距北京一萬三千里自其國由兩廣達于南京自南京達于北京其國王本莫姓中朝以其數叛逆韋王彌為都統使至是為黎氏所滅其使臣即黎氏請封而來者上年七月離本國今年八月方到北京留玉河館又五箇月矣使臣姓馮名克寬自號毅齋年踰七十形類甚怪涅齒被髮長衣潤袖用緇布全幅蓋頭如僧巾搯以其半垂後過肩焉其人雖甚老精力尚健常讀書寫冊不休若值朝會詣闕則束

髮著巾帽一依天朝服飾而觀其色頗有感類不堪之狀既還即脫去一行凡二十三人皆被髮貴人則涅齒下人則短衣跣足雖冬月赤脚無袴襪蓋其俗然也其寢處必於床上不為炕突其飲食略如華人而不精潔其服多綾絹無紋錦綿絮之衣其狀率皆深目短形或似獼猴之樣其性頗溫順略知文字喜習劍技其法異於紀效新書欲令軍官輩學習則秘而不教其言語類倭而用合口聲其中解漢音者只一人以漢譯或文字相通其國俗書則字畫甚異殆不能解見矣初欲觀其文體如何試製長句以送

則使臣輒和之因此往復累度使臣每見睟光等所
為詩擊節稱賞曰文章高了自後必稱大手筆蓋以
他國之文過獎如是也使臣且請曰不佞有萬壽慶
賀詩集敢請使公序其端以沾大手筆澤云云求之
甚懇屢辭不獲遂作書贈之使臣致序曰喜見使公
詩序詞藻燦然過情之譽竊自恥之多謝多謝仍以
橐中所齎土物白線香百枚脂香一器分送又曰聞
貴國筆墨為天下絕品願得之乃以筆墨若干與焉
白線香者極細而長如一條線香氣甚烈脂香者
煮如膏塗著身面經日不滅云

問答

問古之越裳交趾是貴國疆域否

答曰是也

問大人何官

答曰愚老在賤國忝侍郎職

問貴國官制風俗何如

答曰習孔孟詩書禮樂之教唐宋進士科舉之文
問取人以詩賦乎以策論乎亦有武舉否

答曰科舉取人法有鄉試科有會試科鄉試科第
一場試五經四書各一道第二場詔制表文各一

道第三場詩賦各一道第四場策文古今治道一
題會試科第一第二第三第四場同鄉試第五場
廷試策對武科以陣前為上有騎馬騎象騎射之
才五年一選

問舊聞貴國王是莫姓今黎氏乃創業之主耶有何
變亂而革命耶

答曰前者賤國是黎王管封後為莫氏篡僭今黎
氏復舊業再請封

問黎王失國幾年始復舊物
答曰經五十餘年

問貴國有都統使是何官職

答曰賤國自古有國以來未嘗有都統使司之職
將以莫氏僭逆天朝宥以不死權置都統使司
秩從二品以待叛臣耳如今要復王封廷臣方議
定恩賞

問莫氏是莫茂洽耶

使臣乃驚視良久答曰然莫茂洽乃其故王姓
名蓋訝其知之也

問黎王得國是討亂逆耶抑出推戴耶

答曰黎王是代陳氏不祀國人共推戴

問貴人在莫氏朝仕為何官

答曰愚老是黎氏遺臣未嘗任莫

問貴國冬暖如春無冰無雪云信否

答曰南天春多冬少

問貴國有再熟之稻八蚕之絲信否

答曰歲有再熟之稻麥有八蚕之絲麻

問貴國地方幾許

答曰地方五千餘里

問貴國距雲南幾里

答曰隔山千重接壤一界

問距琉球日本幾里

答曰隔海道遠不通

問馬伏波銅柱豎在何地

答曰古傳在於梅嶺今無矣

其使臣問我國制度如何答以官制做 天朝置

三公六部臺省自餘法度悉遵用華制

使臣曰貴大國舊稱文獻之國賤國非敢望也朝

時我國使臣為首立於前行安南使臣
次於後行相接之際每致恭遜之意

識

三昧光於萬曆庚寅蒙差書狀官賀 聖節于京師

遇安南國使臣各處異館禁不得通只於朝會一

再見面而已及幹事回朝於聞見事件中彙錄以
進則上召臣晬光于政院下問安南使臣衣服
制度與其國風俗如何且或有唱和之作並書啓
於是益恨不得與其使臣相問答酬唱以仰復
聖問也逮丁酉冬以進慰使再赴京師又與安南
使臣相值而適冬至賀節外國來者甚夥館宇填
滿幸與其使臣同處一照留過五十箇日故得與
相接甚熟問答甚詳至於酬唱則爾時國被兵禍
念不及他非敢操筆為詞唯欲見其文體而止耳
竊念我國去中朝甚遠中朝去安南又甚遠

計其道途則兩國相去不啻萬里餘矣且其朝貢
不時累歲一至故我國使臣罕能相遇况得與之
同處唱酬者哉然則晬光之得再相遇也豈非有
數於其間而是集也亦前古所未有者也文雖甚
陋事或可傳故且存之以俟博雅君子庶有取焉
爾李晬光識

題

幼從申公所得見權叅判叔強朝京詩帖與安南
使臣武佐酬唱者居多而且附本國閨秀送武佐
之作數十篇如淳于鴛鴦褚玉蘭徐媪之詩皆清

健豪爽能弁髦宮掖艷冶之習蓋亦駸駸乎古烈士擊筑之遺音歟申次韶以為徵則之餘烈信哉今芝峯之詩固冠冕佩玉馮老所和亦非魯魚之混而往往起人者多矣雪屋晴窓燒香朗詠足為一快甲辰冬鰲城李相國題

跋

余於甲午冬奉使京師與琉球國人相遇其使臣年七十有餘則以為稀年之人道海陸累萬里而至將事於天子之庭其國之遣之也豈特取其堅悍不衰而已哉必其有以過於人者也譯而

與之語問其山川風俗之異壘壘不能捨獨惜其矇於文詞志不得相通耳今從芝峯先生得丁酉冬北行中一錄乃與安南使臣唱酬詩也使臣亦年七十有餘是又銅柱之外點焉之鄉之人也而奉其王之慶以來綴復天子之業命且其所為詞律庶幾並華人之為以先生之大雅而不鄙夷與之迭發而相宣其山川風俗之異不憑於譯而了了如東西州然想其目擊心喻之間落地兄弟之歡視余所得可謂尤多矣噫琉球雖小也其國之人才足以濟其國之用况安南非琉球比也寧

又不足於人才而皓白望八之人必勤以事耶夫七十致仕古之制也無乃二國裔而未遵耶或其人能為有無而不可聽其去耶第非政事之謂而使當跋涉之勞則非復優老之道也然今以我國觀之仕而不待年至衰不可事事者比比而有在夫其人則違盡瘁之節而足愧於二國之使臣在夫用捨之地則積薪之譏歸之而二國之使使臣之不如也先生負當世之重余欲以是講之姑書此而歸之萬曆二十九年歲辛丑之臘月三日通川人崔望書于西京之僑寓

春秋之世列國大夫交相聘也賦詩以觀志而或聘于天子之庭得相際也其定言足志亦皆有可觀左氏既載之今考其傳皆歷歷矣芝峯先生之再聘天朝也有與安南國使臣酬唱者若干篇問荅者若干言彙為一卷眎不佞屬以跋不佞遂取而卒業不惟先生詩文足以刮異國之人之目安南人之作亦足以起予更唱迭和金春而玉應於此足見兩國使臣之交際辭令文章略相上下而有以合夫賦詩而觀志也又其言語雖以譯傳而其所以傳志志者為有捨而通之也且其山川

風土習尚據此足反其隅則先生此集可以補王
會之闕而備子雲執轡而書之也先生蚤以文雅
鳴於世其塵垢糝糠將以陶鑄沈謝令其膺簡掄
之命執玉帛于金臺乃與異國人攜藻者又出
於使事之餘則其不負誦詩專對之學又可見矣
我朝二百年文墨之士朝聘上國者冠蓋相望
未嘗聞有與異國人酬唱者獨先生得與安南國
人有所白戰有所激昂乃使異國之人得知我國
文獻之盛而奉使之臣不下於古之人也則先生
此行不但不辱君命又使我國重於九鼎大呂也

且夫安南之臣年已踰七十矣其筋力耳目未覺
少衰其所為詩律頗有得於作者是亦外國之華
也豈其使之也以才而不以年乎燭之武之使晉
也由余之使秦也皆以七十之年安南之國其亦
學鄭人戎人者非耶繫我先生年甚富文甚高才
德又甚優雖使上國之人當之不多讓况於日南
老也何有夫子所謂士者吾固知世無出先生右
者也噫我國去皇都五千里安南去皇都又
萬三千里不翅風馬牛之不相及也而兩國使臣
相遇於帝京又相處於一館又相與之款款又

相與文字從事此若有數存於其間而亦非偶然者天將以先生盛名繫於朱雀影銅柱標耶不佞目擊此篇其亦幸矣又以狗尾續貂後茲非幸也歟萬曆癸卯十月之望延城車天輅書于終南山下

李芝峯安南使臣唱和集一卷觀其宮商相宣金石諧和錫鳴皎潔閑淡溫粹章我東之文獻振大雅於蠻貊猗歟盛哉有晉州士人趙完璧者丁酉之變為倭所搶去嘗自日本隨商倭再至安南見其國內人家家傳誦芝峯詩若捧拱璧如仰神人

以問於完璧曰若既是朝鮮人若知爾國李芝峯乎相與嘖嘖不已其歆艷傾慕在在皆是完璧近歲得返本國鄉土據其所見聞有此云云頃者友人金君允安由晉山入漢陽見余道其事甚悉嗟呼世之文士其孰不操觚弄墨點綴韻語作為詩章而獨芝峯一集擅名成家為國之光感人之深且遠至此何哉是固得處深妙必有真宰而不得其朕者在蓋不可但以詩律語句看過而已後之覽者尚有以知此哉昔萬曆辛亥仲春鄭士信叔孚書于漢陽之旅舍

秀才趙完壁晉陽人也丁酉之亂沒倭中嘗隨商
倭往安南國古越裳氏界也所經海水有五色之
異竒詭之物朝暮見伏無常不可殫紀一日遙望
數十步之外白沫洒空蒼鱗閃閃漸見蜿蜒而前
若欲跨行舟而偃息者蓋龍自海中欲奮迅騰空
而未易致力故也一行愕眙煇活雞數十投之乃
避去大洋茫茫莫可端倪有華人之解事者在行
中鈎出水底土視色而辨方焉越重溟冒層濤如
附桔槔而下上水行五十日方到彼岸國俗被髮
袒齒其性柔順習詩書之教官制法度略倣中

朝聞生為東國人爭來見以詩卷誦而告之曰此
乃徐國李芝峯作也稱歎不已生意芝峯是異代
人謾不致省後數年回本國具以事語人始知所
謂芝峯乃今春官亞卿李公晬光所自彌而詩即
公聘上國時遇安南使臣馮克寬於逆旅相與
唱酬者也豈謂適然而遇咳唾餘屑散落銅柱之
表人之寶之不啻若九苞一毛自絳霄而墜也噫
世之人嘔心肝詠月露欲托此而名不朽者何限
而風聲過耳湮沒不傳况望遠播於重譯之鄉使
人雋永之不已耶彼之有意而所不可得者公無

為而得之有餘是何以而致也詩曰鼓鍾于宮聲
聞于外言有其實則其應甚易也以此而推安知
公前後朝天之作不並被天墀管絃以鳴吾東
大雅之盛也金君而靜聞此事於趙生語余甚詳
異而識之下一轉語以備史氏之採取萬曆辛亥
暮春興陽李峻識

今 皇帝二十有六年芝峯子回自京師余方赴
京相遇於龍灣叙暄涼畢訪中國奇談則出示安
南使臣馮老唱和詩若干篇余得以卒業已卜芝
峯子咳唾散落銅標之外及抵玉河館馮老既去

而筆迹猶在壁上恨不得接其辭為異之聞也後
十餘年得見叔平氏所記漂海人所傳則前所稱
芝峯子咳唾散落銅標之外者不既驗乎昔梅直
講作春雪詩西南夷人竊取而織布成章流入中
國蓋愛其詩為絕寶也蘇內翰用為琴匣置之几
案仍作騷壇好事今交趾能言東國有芝峯者天
下文章人誦其名家有其詩重之若驪龍之珠威
鳳之毛至於刊刻傳播海外諸國賢於西南夷之
一匹布遠矣織與不織為琴匣以否固不論也歲
辛亥日南至余與芝峯子俱賀節於天朝薄海內

芝峯先生集卷之八
外咸集闕下而琉球暹羅則同寓一館其山川風俗之異可以書相聞而二國之价不開文詞意未得通苟有如向所謂馮老者來芝峯子必表前日未發之葩使波間人知吾東文獻之盛余亦幸而傍觀足暢襟以自快惜乎其不來也驪興李尚毅書于北京會同南館萬曆三十九年十二月大寒日也

芝峯先生集卷之八

芝峯先生集卷之九

琉球使臣贈答錄 辛亥赴京時

贈琉球國使臣近體十四首

相逢萍水帝城中目擊從知意自通金闕瑞雲朝佩響玉河明月夜尊空休言海外乾坤別却喜天心雨露同聞道南州梅信早肯將春色寄來鴻

一笑燕雲萬里臺羨君行色日邊回中原地向南溟盡去路船從百越開橘浦烟深啼翡翠龍溪雨濕熟楊梅東風入律波濤息為問他年倘再來龍溪地名聞說君居瘴海溼拍天鯨浪濶無津封疆久與耽羅

近風俗應將駱越親南極星辰千島曙北山花卉四
時春交鄰舊好須相念異域何嫌識面新聞琉球與

頗相近北山即琉球地名土氣甚暖故云

炎鄉杳在海中間從古風烟接百蠻地勢雄臨龍伯
國溟濤屹立濟靈山輕綃久識芭蕉細異貨曾聞玳
瑁斑歸去應知皇澤厚好隨春色一時還濟靈山即

乃其國所產

衙命來從海外天驛程行盡幾山川皇家一統車書
日使節同觀禮樂年燕地風霜春筆下浙江烟雨暮
帆前遙知別後襟期在夜夜分明片月懸

火海茫茫接大荒祇憑剗木作津梁波間日月開封
域徼外河山漏職方地產珠香充貢篚身將玉帛側
班行使歸定向居人道中國于今有 聖皇

舶趁風來海氣腥蛟龍窟上雨冥冥陰崖十月梅花
白曲岸三冬荔子青東極先看陽谷日南溟俯瞰老
人星相逢自是前緣在異說如今儘可聽

傾蓋烏蠻笑語同心親不待象胥通羈愁夜對燕山
月鄉思春隨海嶠風地入波濤迷上下天懸星斗辨
西東知君掛席歸程穩興在虛無指點中

曾從輿地誌中參風俗山川已熟諳日月並明天內

外波濤不隔海東南間關水陸炎程萬辛苦揚帆象
譯三邂逅今朝真自幸使還他日足奇談

神仙本自海中居南斗星躔切太虛風汎往來徐市
國山川出沒祝融墟樹浮白日連赤城浪蹴青天入
尾間安得隨君輕棹去共尋蓬島跨鯨魚

折木津連積水餘幸逢冠蓋會中華樓舫遠涉馮夷
窟使節來乘海客槎萬里踏殘燕北雪二年開盡日
南花人生落地皆兄弟况值車書共一家

漲海之中若木西提封自昔近雕題地窮南紀星辰
大天豁東溟日月低山出異禽饒翠羽水藏靈獸富

文犀揚帆會得長風便脚下洪濤路不迷

憤憑重譯覲天王國踰流求肇自唐千古山川香作
界一方民物海為鄉鯨鯢噴水恒成雨橘柚經冬不
見霜聖化抵今無遠邇想看文教洽窮荒流求之稱始見於韓

昌黎送鄭尚書序中又楞嚴經曰曰香所生以香為界

炎徼人烟是故園東風萬里引歸軒湖邊青草春光
動嶺外黃茅瘴氣昏路盡七閩惟有海天連南極欲
無坤客中惆悵燕山夕多少離情贈一言

奉酬贖敬朝鮮台使

琉球使臣蔡堅

海外覲面是奇逢詎知一見即包容 皇恩浩蕩

均露被珠玉淋漓我獨深長才偉略靡雙匹幹國
謀王第一人予心感佩真忘寐端俟他年教復臨
爾勤申贖朝鮮台使 琉球使臣馬成驥
堯天舜日照遐方航海梯山來帝邦不期而會天
下國凡有血氣悉稱降邂逅相遇雖萍水前緣夙
定非偶然喜承晤教固所願倏爾東南兩分還

謝琉球使臣贈詩及刀扇

燕市相逢意氣豪感君持贈重鵝毛傳來妙墨披金
莛格外清詞動彩毫明月乍隨鸞尾扇赤霜新洒鴈
翎刀歸裝十齎須珍玩眼裏長思手亦勞

後

琉球國在東南海中使臣蔡堅馬成驥從人并十七
人皆襲天朝冠服自言庚戌九月離本國水行五日
抵福建由福建陸行七千里辛亥八月達北京寢處
不於炕突雖盛冬必沐浴狀貌言語略與倭同自僕
等到館頗致慇懃之意願得所製詩文以為寶玩故
欲見其酬答略構以贈而堅等短於屬文不足與唱
和耳且聞要賀我國黃筆乃以二筆二墨贖之堅等
亦以刀扇各一為禮蔡堅則能解漢音以譯語相問
答如左

問貴國地方幾里

答曰壤地褊小不及朝鮮一布政所東西僅萬里

南北七千里

續文獻通考曰琉球最小時方萬里七千里之說謬矣

問貴國尚儒道乎釋道乎

答曰尊尚孔子之道而釋子亦參半焉

問科舉取人之規

答曰三年一大比取文武科各一百二十人國有慶事則有別舉俺等亦登第之人

問風土寒暖

答曰土氣甚暖而北山一都為最稻一歲再熟

問國王姓氏

答曰姓尚名寧

問立國以來傳祚久近

答曰經今二百五十餘年傳二十四世

問開國以前為何國

答曰國名吾氣享國僅百年

問吾氣之先為何國

答曰吾氣以前未有文字無書籍可記

問距日本幾許

答曰可萬餘里其間有諸島各自為國修貢于琉

球曰本

續文獻通考曰自薩摩開船可四日到琉球則此說謬矣

問貴國與暹羅相通乎

答曰遠不能相通道路不知幾何

問貴國與何國相近

答曰上國最近貴國次之曩者貴國送回敝邦漂海人口其人尚在止山生住以此知道里不遠

問貴國有三國分立皆彌琉球云信否

答曰否本國方都中山而設都三處曰中山曰南山曰北山此必傳說之誤

問貴地有鸚鵡乎

嘗聞祖暹朝琉球遣使獻鸚鵡故問之

答曰否如玳瑁硫磺芭蕉等物皆土產也

其使臣又問譯官曰貴國常着紗帽網巾乎譯官答言紗帽着於公會平居皆着冠至於網巾無貴賤常着其使臣曰本國則常時不着網巾與冠矣

附暹羅

暹羅國在西南海濱水抵暹羅約一萬餘里自廣東陸趾北京又八千里國姓止有四王姓照做官姓握中戶姓奈下戶姓隘使臣握坤喇奈萬低厘副官握孟喇庚戌三月離本國辛亥十月到北京語音用番話不識天朝文字

七人皆剪髮僅餘寸衣服詭
或如海鬼據不知拜揖左
擲石灰有華人姓徐者往來其國稱通事官隨來稍
解文字問其俗則以書答曰道路由廣東香山
縣開船用此風下指南針向午行出大海名七洲洋
十晝夜可抵安南海次有一山名外羅山八晝夜可
抵占城海次十二晝夜可抵大崑崙又用東北風轉
舟向未針兼申三分五晝夜可抵大真樹五晝夜可
抵暹羅港即淡水又五日抵暹羅城此皆以順風計
也其國家連大尼南
正接蘭場北界大海地

方大小難以里定所產象牙胡椒蘇木烏木檀香速
香藤黃豆蔻之類其異物則有鱷魚龜蛇等項土氣
寒少暖多往還遲速未能以年逆計云求見其國地
圖則國中有沾奔必加山島腦細六昆東骨胎上水
比西祿蘭場八布政使司皆列島也其屬國則有占
城國甘坡國爪哇國大泥國加蘭丹國崇國彭亨國
烏冲國滿刺加國沾波國其南有雅者國東牛國雅
魯國其東有順塔國加刺把國白加山國龍松國馬
里祿國其外南海極深不知際岸珊瑚生於其中最
東有琉球國日本國西南有佛浪機國即大西洋也

海中有小橫大橫假樹真樹小崑崙大崑崙烏猪外
羅沾必羅等山又龍牙二山橫截海中中擘為門濶
十餘丈以通海水又東南海中有萬里長沙萬里石
塘連亘回抱形勢甚異琉球之東有大小硫黃山北
有七星山小東山南有一山產龍涎香餘不可盡紀
其使臣為奏請冠帶而來 天朝始許 欽賜冠服
不著網巾而穿帽束帶齟齬可笑余所見安南琉球
暹羅如此則海外冠帶之國其亦鮮矣

遇暹羅使臣

萬里暹羅塊海中七洲洋外水連空山形直到龍牙

斷國俗曾將葉柳通偏壤自來魚鼈宅兩鄉相去馬

牛風幸逢黃耆真奇事疑是梅南舊老馮七洲洋海

故名葉柳古扶南國王梅南即安南昔與安南使
馮克寬相遇年七十餘矣今使臣齒與之齊故云

遙賀彤墀幸共然得聞風土飽相諳乾坤界別中華

外日月光分北戶南跋涉溟濤應過萬來庭歲律已

經三欲將彩筆圖王會歸與東人作異談

右用前日贈琉球使臣韻

壬子正月僕等在北京與琉球國使臣相見五月

還 朝至七月濟州牧使李珣馳 啓本月十二

日有異樣船一隻停泊于本州麼羅島港口卸下

八箇人自說琉球國使臣進貢回還遭風缺食要
乞水來以歸牧使領進軍兵將欲接應坐舡人等
疑恐却棄卸下人口掛帆還走不知去向其八人
中有姓名馬喜富者稍解華語供稱俺隨長史蔡
堅進貢 天朝與貴國使臣某某相見今年正月
二十三日離北京五月到福建七月初一日開舡
十二日在海遇風來泊貴國地方云即將馬喜富
等來京譯審官給衣帽盤纏押送 天朝夫琉球
距我國隔海宵遠自北京而福建由福建而我國
又益遠水陸所經不知其幾許萬里而僕等與其

國人相遇於北京僅數月間又漂到于我國可亦
異哉

按續文獻通考曰暹羅國方千餘里本暹與羅斛
一國地暹乃赤眉遺種元至正間始合為一國萬
曆二十年九月經略侍郎宋應昌奏暹羅國正使
捏叭喇等願督兵蕩勦倭巢奉 聖旨夷使所稱
其見忠義事關重大另選一能事官員同往彼國
宣諭朝廷德意取有回文方可舉事云夫暹羅距
日本累萬里而奮願舉兵紓難事雖不行其志氣
可尚也又按琉球在外夷最小而險自福建梅花

所開洋順颺利舶七日可至其國自古不通中國
元遣人招諭不從 皇明洪武初中山王遣子弟
入學自後夷習稍變被服冠帶著作篇什有華風
焉又吾學編曰琉球賦法略如井田王及臣民各
分土為祿食上下無征歛用刑甚嚴兵甲堅利好
爭狠鬪輒刃殺人度不能脫即剖腹自斃云蓋其
俗與倭相類可

按高麗時洪武二十二年琉球國中山王察度遣
使王之奉表稱臣獻方物刷還被倭擄人口到順
天府乃遣迎接使以待之差典客令鄭允厚等報

聘于琉球國云余頃年遇琉球使臣蔡堅等以
京則堅等屢言洪武時通聘之事蓋謂此也又慵
齋叢話言 成廟朝琉球遣使求貢本集中有琉
球國進白鸚鵡表今琉球使臣接待事例載在憲
典而 成廟朝以後遂絕不通至 先王朝庚寅
琉球國人要宇等漂到本國地方押解遼東轉奏
刷還所謂其人尚在北山生住者此也范至能桂
海志曰南人喜食檳榔用蜆灰並扶留藤同咀則
不澁又曰以檳榔蛤灰奉賓客土人作小合為三
室一貯灰一貯藤一貯檳榔云余赴京時見暹羅

國人常喫石灰擯擲意甚怪之今得是書始知所喫非石灰乃蛤灰也李晬光書

芝峯先生集卷之九

芝峯先生集卷之十

朝天錄

始丁酉八月
止戊戌正月

渡江舟中戲成

時倭報甚急地
主亦不出送

寂寞扁舟鴨水津風光猶似昔年春誰能解唱陽關曲唯有江波送遠人

遼東

東北雄藩控一方遼陽自昔壯金湯天連瀚海秋常早地接陰山夏亦涼跋馬塵沙隨客袂賦詩風月入奚囊薊門此去知何許塞草關雲萬里長

海州衛

孤城雉堞杳難分
鼓角喧喧到處聞
駿馬人皆燕俠
客輕車誰是漢將軍
龍沙日照回中雪
鴈塞烽沉老
上雲從古華夷交
枕地倚樓吟望正
西曛

東昌道中

遼西征路接燕幽
大野茫茫極北陬
白草連天秋色
老黃沙滿日夕陽
愁鋪聞八里如名
近河喚三義學
字流望裏東昌看
更遠暝鴉飛盡古
城頭八里鋪地名

路遇戰馬千百為羣將給東征戰士者

名駒躑躅耳生風
一來從渥水中價
重燕亭千里
駿色殊天厩五花
駘龍荒宿草吞應
盡鴨綠長波飲

亦空待得明春征
戰罷好歸烟月華
山東

次古長城韻

設險初期北虜平
豈知胡向膝前生
山河畢竟歸劉
氏不是秦城是漢
城

盤山

盤山城上月如盤
夜宿孤郵暫解鞍
聽盡曉雞眠屢
警北風吹作五更
寒

寫懷

作客頻年萬事非
風塵潦倒壯心違
霜驚志士秋來
鬢淚滿孤臣病後
衣上國繁華愁裏
過故鄉迷路夢

中歸東雲底處傳消息碧海天長鴈不飛

路逢李總戎如栢打圍

隴西家世總才雄人道兒郎有父風紫電青霜千劍
戟金羈鐵馬萬羆熊寒雲箭落飛禽盡曠野塵駟穴
兔空較獵定非供戲樂東征將欲試戎功

塞下曲

邊塞秋來早閉關朔天雲淨雪中山單于獵罷歸窮
漠漢將橫戈意氣還
東北煙塵靜帝關漢家功業勒燕山胡姬粉面能騎
射日暮雙雙走馬還

路傍古墓

荒墳臨大道宿草有殘碑年代不知幾雲仍今是誰
野燒芻狗没山晚石羊悲客意正凄切寒風鳴樹枝

夷齊廟

今古灤河水名因二子奇城寒孤竹國山遠採薇時
香火千年廟清風百世師客來重起敬再拜讀殘碑

次夷齊廟板上韻

人心爭去紂大義獨存商最恨磻溪叟來從渭水陽
朔風魂魄苦春雨蕨薇芳浪死田橫客區區笑半洋

玉田

香香秦京道淒淒楚客愁雲歸遼海夕鴈度薊門秋
綠水環朱戶青帘隱畫樓囊空無酒債輕脫鷓鴣裘
玉田次而述韻

紅樓珠箔掩笙歌十里分明畫裏過楊柳東頭皆玉
女彩橋南畔即銀河千門碧樹秋深少萬井青烟日
暮多明月曲欄清夜後美人何處望姮娥

祿山橋

譙樓畫角暮城頭山色蒼蒼落日愁遺憤千年橋下
水至今難洗祿兒羞

冬日食來禽果

奇品端居衆果先應須箇箇直千錢當寒暑倩偷難
得解渴文園病即痊霜着玉肌嘗屢軟露凝猩頰摘
來鮮令人一嚼除煩惱逸氣飄飄骨欲仙

夜坐書懷

帝里光陰逼歲除寂寥庭院鎖深居銅龍漏滴三更
後金鴨香消一炷餘愁裏澆胸樽有酒客中彈缺食
無魚寒來病怯窓前月唯把殘燈照夜書

遣懷示而述十韻

才俊吾而述風流自不凡官清負外置職重殿中監
鴈塞隨金節鸞書捧玉函踈慵今白首潦倒舊青衫

羽檄飛千里音塵隔一緘傷時同賈誼居郡異陳咸
鏜彩聊趨俗持心不畏讒沉冥真吏隱酸冷假頭銜
素志投朱紱高情憶翠巖尊鱸有歸興滄海一孤帆

荊州道中

驛程迢遞暮雲間落日蒼茫鳥獨還望裏烟鬟纔一
髮行人說是荊門山

見獵者

白面誰家子橫行官道傍向人誇意氣躍馬射黃羊
深河

榆塞陰雲凍欲無隔林烟火數村孤斜陽半露青山

面彷彿龍眠水墨圖

酒店

多少青旗出畫牆床頭酒滴小槽香燕姬掩面含羞
態背指銀瓶款客嘗

自十三山雇車夜到閩陽

行子車中宿起看車上霜野烟迷去路邊雪濕行裝
群動方潛息殘生獨歎傷孤城夜正黑何處覓閩陽
塞下兒

輕身塞下兒少小能騎馬擘箭向黃雲飛塵驚平野
風沙何處歸應宿遼城夜

伯顏洞

病客窮山裏崎嶇石路危塞深刀斗靜村冷橐駝飢
古洞雲埋逕寒林雪壓枝春光何處覓消息柳先知

三渡河

道野蒼茫征馬遲陰風慘悽寒天悲長河百尺冰猶
滑古峽三冬雪未滋臺中龍虎去已遠山上鳳凰鳴
何時栖禽入樹雲歸壑日落行人迷所之

龍灣別李輔德而遠赴京

歸來故國歲新更今日孤城又送行天末路連燕塞
冷雪中入度鴨江晴一年跋涉言猶厭萬里間關夢

亦驚折贈橋頭楊柳色東風無限別離情

箕城別而述先向海西

倦路經年尚未歸帝城烟樹夢依依關河白雪埋
春色遼薊黃塵入客衣身逐北雲曾並轡淚添南浦
各分飛橋頭柳短難堪折江水無言對夕暉

跋

萬曆丁酉皇朝中極建極諸殿災余膺命為
進慰使尹佐郎繼善而述為書狀官同赴京師尹
公方以文藝自名沿途遇興援筆立成殆累百千
篇余雖不才且病未免技癢凡山川風俗之異樓

臺民物之盛與夫去國羈旅之思一於詩發之相
與白戰有唱輒和誠不覺道途之遠鞍馬之勞也
今略存其槩題曰朝天錄其與安南使臣唱酬者
別為一集云

芝峯先生集卷之十

芝峯先生集卷之十一

半槎錄

起辛丑十一月
止壬寅三月

宿大慈寺次沈相公一松韻并序

昔在庚寅仲冬余隨故李尚書山甫公自燕
京回宿碧蹄館今吏部一松公在大慈寺送
一詩以慰行役今十有二年而余適嚙
命來宿于此時又仲冬也尚書公去世已久
感而成之

冷煙堆裏古禪關
門枕寒流碧一彎
幽徑客從斜日
入暮林僧共宿雲
還龍灣舊跡天涯路
馬首新詩雪

後山斷磬孤吟追往事可堪惆悵十年間

斷磬孤吟乃用一松

詩中語也

曉發開城

馬毛如蝟曉霜凝冷逼吟鞍病骨稜青石雪埋雙峽
路白楊烟鎖十王陵荒臺有恨千年月別澗無聲一
夜冰望裏金郊知不遠亂峯呈翠凍雲層

龍泉館

薄暝投空驛疎林鳥宿時人寒依竈火客暖待村醪
忍凍拈吟筆呼湯鎮病脾宵分仍不寐缺月下西池
劔站闕官候仍憇山店

古驛居人盡空村草樹連青山流水畔白屋小峯前
棘刺衣從破溪水馬怯穿嶠嘔問征路西日送吟鞭

劔水

既以劔名水胡乃潛其鋒軒轅之所遺歐冶之所鎔
精光能射斗變化即為龍青萍久淪沒薛燭今難逢
從此延平津一去杳無蹤水我果何取但見波溶溶
安得淬利刃萬古除羣兇

棘城

洞仙南畔鳳陽城荆棘叢中路不平林下怨烏啼有
血石邊流水凍無聲烟塵故壘鷗晨落風雨荒原鬼

書行往事淒涼何處問客來今古一傷情

洞仙館

洞仙風雪十年情匹馬重遊眼更驚曾是故人相別
處水流猶作斷腸聲

贈車秘書天輅

論文每喜刮金篦何幸茲遊偶共携博學談天傾縷
下雄詞拔地陋江西三生翰墨千篇富北載官衙五
品低知得錦囊珠玉滿歸裝他日免輕齎

次朴說之贈尹黃州韻

慣曾為客此中遊聽斷笙簫月下樓千里塵沙重跋

涉一場樽酒舊風流裁詩有興山當眼倚醉無端帽
側頭聞說政聲人共頌蘓仙今復在黃州

夜中和抵涓水

生陽館裏日三竿卯酒微醺破早寒遙望碧城圖畫
裏彩舫輕颺古江干

自黃州先到箕城錄奉月沙并諸從事

同來却恨不相隨回首黃岡策馬遲雲隔玉人迷使
節雪粧瓊樹想仙姿腸回古館陽生夜眼斷孤城日
落時認得行旌猶未遠文星已動涓江湄

第三聯
云云

小至日宿
生陽館故

贈李正郎子敏

一蹴青雲萬里開
衣冠德水世多才
文星久向南宮
照使節纔從北極回
詩筆雄詞籠物色
酒盃豪氣動樓臺
路人拭目瞻行蓋
書記何如御史來

墜馬傷右臂戲成

宣慰才名錢不直
誰言聲價馬難支
輕身偶犯垂堂
戒委轡還忘朽索危
傷足向來憂孝子
折肱從此作良醫
浮生禍福何欣戚
左手猶堪把酒卮

箕城病卧遇雪錄奉月沙

頑雲醞雪下江城
亂入重簾細有聲
萬樹梨花春富

貴千門璧月夜分明
舟中訪友騷人興
驢背尋詩病客情
須識天公偏解事
故教旌節滯嚴程

肅寧館

千里遊蹤十載寒
樓臺隱映暮雲端
當年意氣豪狂甚
贏得居人指點看

安州

路盡安陵歲暮天
碧城西北古清川
氣連葦葦雲沉海
寒入漁簑雪壓船
詩思灞橋驢背上
客愁關樹馬蹄前
今來病負登樓興
誰識風流李謫仙

拱江亭

堅冰坦成陸來往免乘危馬滑行偏怯孤寒聽不疑
日臨金閃閃天映玉差差愁絕津亭夕青山亦白髭
在箕城以病落後速接一行先發寄南郭老兄
病裏輸君早着鞭不堪淹卧涓江邊汰來瓦礫宜居
後行處駑駘敢在先梅蕊暗驚當臘日柳絲輕媚欲
春天相思一片龍灣月幾向愁中看缺圓

嘉山

安定館中初月落嘉平嶺上曉星高十年馮首頻千
里萬事人間已二毛關樹刺天迷去路峽風駘雪撲
征袍只今無復為州夢謾有歸心折大刀

曉星嶺名

元日

孤卧山城病裏身旅窓還遇頌椒辰香燈舊俗消殘
夜梅柳新粧媚上春四十年光初滿日一千里路未
歸人夢魂不道天涯遠清曉依然入紫宸

夜吟

卧久寒窓夜色遲病來心事一燈知間關世路餘霜
鬢潦倒年華斷酒卮雲外林巒晴雪後水邊籬落早
梅時三生宿債消難盡強欲抽毫試覓詩

入日

經年仍抱病今日喜為人相酒追歡夕梅花漏洩春

江山新氣象詩句舊精神擁褐寒窓畔殘燈夜獨親

倦遊

倦遊經歲馬蹄穿藥餌扶身病未痊世事自生新白
髮風情不減舊青年西湖欲動尋梅棹北郭初晴掃
雪天明日清川江上路好看吟聳灞橋肩

有感

西遊行盡短長亭誰記風塵老客星唯有多情驛邊
柳春來着眼向人青

憶歸

憶歸休上望鄉臺隔歲蓬門尚未開西塞山川翰點

筆南樓風月入停杯寒消野渚年前雪暖到江城臘
後梅東洛故園長在夢好隨春色一時回

博陵

博陵烟樹暗迢迢渡口平沙閣暮潮萬里雪中開玉
界二江冰後駕銀橋天寒白屋依林小日落青山隔
海遙吟盡客懷歸未得一窓愁病掩蕭條

題畫

凍雪離披曲岸西冬青苦竹互低迷山禽也是多情
思來向梅花樹裏棲

聞補賜

誥命冕服迎

勅後陳賀有感

帝澤隨春域外覃九天綸綍映芝函河清慶會千華
一華祝歡呼萬歲三心切子牟思魏闕病同司馬帶
周南龍墀此日違趨賀歌頌無能只自慙

自嘉山東還寄懷月沙

梅花落後杏花風強半春光逆旅中千里西來遠附
驥一槎東去趁歸鴻艱危抱病詩排悶磊砢澆胸酒
策功招帳勝遊辜宿約故人青眼幾時同月沙詩有勝遊重約

臨江酒之句故云

浮橋

百丈津頭簇萬松危橋倏架亘長川蛟龍抱柱千尋

窟烏鵲橫河七夕天華表畫懸滄海日彩虹春卧碧
波烟使君威令同神造血石駟來不待鞭

安興館

乍寒天氣半陰晴曲岸新泥水欲生千里烽烟來絕
塞百年愁病倚孤城雪藏深樹春無色潮落空江夜
有聲為客異鄉淹卧久東風多少未歸情

百祥樓

萍蹤曾作仲宣遊脚踏西關數十州一夢五年來又
去春風吹入百祥樓

有懷玄軒

樽酒城南夢舊遊
客來經歲卧西州
窮鄉問病誰青
眼遠地逢春自白頭
江上風波無日息
世間歧路幾時休
百年知己玄虹老
應隔天涯共此愁

道中

東風引我故鄉還
二月春光驛路間
何處玉人吹玉
笛曲中楊柳滿江關

漫書

輕冰初散軟風吹
春色今年也自遲
江上梨花猶白
雪渡頭楊柳未黃鸝
北門烽火平安後
東路塵沙跋涉時
景物撩人吟思苦
錦囊新得幾篇詩

安興村舍

孤城日午掩重茅
曲岸東頭二水交
江國病餘無客
到野扉春後有僧敲
杜陵詩句多因興
楊子文章未解朝
懶向芳園尋物色
嫩紅偷着小桃梢

清川感古

水驛微茫大野頭
百年懷抱倦登樓
窓聞小雨天難
曉城枕寒江地易秋
烟外亂山朝暮色
寺前芳草古今愁
客來欲問隋唐事
相對漁樵一笑休

寒食前一日風雨甚惡

春信無端雨送來
餘寒悄悄作愁媒
花神苦被封姨

妬勒盡芳心不放開

寒蹤

寒蹤本出涸陰鄉
潦倒猶無得熱方
人世塞翁曾失馬
路岐隣客幾亡羊
原思志業貧非病
杜甫平生老更狂
須識自家清意味
蕭然高卧北窓涼

登小亭望江口

靡蕪十里俯江臯
隔屋春聲聽怒濤
帆腹好風朝後飽
浪頭新水夜來高
登樓興逸題黃鶴
跨海心雄掣巨鼇
寒却鳩盟歸未得
夢隨蓑笠入漁舠

次簡易堂韻

簡易堂即崔同知豈以堂為號

休道騷壇李杜亡
知公文敵與爭長
高名今古瞻山斗
美瑞賢愚識鳳凰
開筵逢蒿追蔣詡
滿舫書畫比元章
詩中物色分留少
更把何詞揭此堂

賴公風雅未全亡
文襲先秦韻更長
逸足跼途千里驥
竒毛驚世九苞凰
聲名上國騰牋奏
寵渥中天煥寶章
歲晚工程歸簡易
百年無恙讀書堂

天辨誣時事

箕城感古

少年豪氣壓梨園
處處樓臺歌吹喧
萬古山川箕子國
一城花柳莫愁村
綾羅錦繡傷心色
風月芙蓉滿

目痕往事登臨成感慨斜陽獨立普通門

春曉

遙夜山城聽子規五更羈枕夢醒遲推窓正見空庭
月掛在梨花最上枝

即事

佳麗名都景最饒滿城晴日綺羅嬌遊人白馬長安
市美女青樓淚水橋花外轉笙鸞巧舌風前學舞柳
輕腰一春無賴繁華地病後書窓坐寂寥

長安平
壤別名

西游

西游意氣昔何雄鞍馬山川脚底窮江館梨花三月

雨驛樓楊柳十春風重來領略身今病一去繁華夢
已空堪笑浮生緣底事百年辛苦路岐中

客意

驛邊楊柳綠初斜春色淒淒苦憶家客意尋常驚節
序詩情多少感年華兩三點雨濕榆莢廿四番風吹
揀花臨路羨他耕野叟一犁隨分足生涯

春

入眼溪山活畫新柳眉花臉捻精神東君定是丹青
手描作人間萬象春

戲題

東風無意緒似與人相忤掃盡枝上花不掃愁痕去
偶書

關河千里遠宇宙一身孤策杖閑多少吟詩病有無
春愁憑燕語午睡任鶯呼久負啣杯興花應笑殺吾

三月十日

韶光九十餘二十佳景忽忽能幾何青山半面夜雨
濕紅杏一村春風多香迳含泥燕築室芳園釀蜜蜂
分窠前歲離家客未返夢中歸去空烟蘿

蕊秀嶺

嶺名蕊秀秀而竒一十年中四過之着眼山靈應識

我多情物色故須詩風雷萬壑晴泉落錦繡千層宿
雨滋駐馬貪看心未愜夕陽回首獨歸時

玉溜泉

泉流泱泱石粼粼水色山光儘可人欲學佛圖來洗
濯此翁方寸本無塵

道中

數家烟火野橋前極目荒墟樹接天人向亂峯青處
去犢尋芳草綠邊眠棠梨影下空流水布穀聲中未
種田三月妨農兼惜雨西民何以過今年

吾助川午憇

年年草色上征袍西塞羈遊問幾遭山鳥笑人長後
役津亭送客亦勞勞金巖霽日初紅杏劔水春風已
碧桃吾助川能助吾興新詩寫出氣偏豪

述懷

一官何苦老難休卧病生涯得自由詩似巧工雕萬
物酒為長筵掃千愁鳥啼有恨催春盡花落無言逐
水流文字向來堪遣興連篇富可敵公侯

還家

餘生專荷 聖恩偏千里歸來馬死年芳草閉門三
月後落花扶杖一春前詩中結社無鄰並酒裏忘形

有聖賢老去此身甘寂寞不妨堅坐守吾玄

跋

萬曆辛丑冬 聖朝冊封太子 詔使粹臨 命
選擯伴諸臣以迓于境上於是李判書廷龜為遠
接使朴正郎東說李正郎安訥洪佐郎瑞鳳為從
事官金正玄成車校理天輅權教官鞞為製述官
余以不文亦膺迎慰都司之任乃中道墜傷疾甚
不克竣了使事辭適以還其所得詩僅若干題曰
半槎錄蓋迓迓 詔使者東槎有集古也今余是
編率皆馬上口占重以久病荒耗音調體格亦多

芝峯先生集卷之十一
未諧雖不敢僭擬於古之作者然觸物寓思因辭
托諷則於咨詢之義或庶幾焉爾

芝峯先生集卷之十一

芝峯先生集卷之十二

鶴城錄

鶴城即安邊舊號亦稱登州
起乙巳正月止丙午三月

得郡漫成

樗散從來世共捐
半生榮宦謾推遷
傷禽側翅猶驚
木老馬低頭欲乞年
五色有絲難補衮
六奇無策可
安邊行程好
逐東風去一夢先飛海月前

正月二十五日

拜辭出郊占

行蓋春隨北鴈飛
雪殘關路柳依依
回頭政見終南
色立馬橋西待夕暉

宿抱川白兄宅

朝破海郎霧峽深林色昏雲寒祝石嶺日落稼山村
岸柳還新意溪沙自舊痕懸燈卧未穩策馬又梁門

永平途中

二月韶華媚上春天應慰我病吟身迎人野柳初青
眼喚客溪桃欲絳唇風織水紋羅縠細雨粧山態畫
圖新茲行到處供歡賞且莫臨岐說苦辛

過弓裔故城

弓王雄武攘三韓恃力驕淫竟自殘當日但誇攻取
易末年誰信守成難鐵城臺殿荒烟古斧壤山川霸
氣寒莫遣遺墟都掃盡永留殷鑑後人看

金化途中

少日邊頭脚欲窮州符晚佩鶴城東翔鴻身世辭南
土燕馬情懷向北風三夜鄉關孤夢裏一春岐路苦
吟中壯心未了時看劍目下胡沙萬里空

淮陽

淮陽風土頓清新三月層冰柳尚顰巖頂蓄畬平地
少水邊籬落數家貧溪雲翳日天將夕野燒籠山草
不春入境喜看公館靜此間知有卧治人

踰嶺宿高山館

鐵嶺巉岩鳥道懸高山東北即安邊乍臨絕壑疑無

地却下平原別有天百里桑麻寬世界千家花柳好
風烟遙看竹馬來相近顧我慙非郭伋賢

智陵

翼祖陵名智貽孫世累仁松楸曾幾歲雨露又今春
拱衛山河壯瞻依棟宇新年年寒食節州吏奉精禋

上年新創丁字閣故第三云

謾書

自詫老為饒太守山肴野蔌滿盤肥臨餐每被傍人
笑菜有當歸客不歸

釋王寺宿夜

天公不阻興欲雨晚還晴淡月詩中色寒泉夢裡聲
林花春後發禪榻夜深清坐與山僧語超然象外情

悼全僉使伯玉

潼關為虜所陷伯玉不屈而死

可惜全僉使梟雄舊絕倫城孤先受敵力屈竟亡身
骨斷邊風夜魂飛塞雨晨從今鴈門郡無復射雕人

送春

今日正當三月晦流年不覺髮邊催湖山落手身如
夢文簿埋頭眼未開花雨捲將春色去竹雲低送午
陰來從前斷酒因衰病却為東君把一杯

別李台徵赴吉州

那堪送春日又送故人行乍會燈前面偏傷客裡情
夕烽生絕嶠朝雨濕孤城想得威聲遠羗胡到已平

郡齋即事

界別人烟衆關通鐵峽雄青山連靺鞨滄海近瀛蓬
朔氣朝昏霧邊聲晝夜風自憐慵病守坐嘯夕堂空

其二

第一咽喉地關河控帶重樓名聞駕鶴山勢認蟠龍
嶺路三冬雪官門十里松此間容吏隱高卧揖仙蹤

郡齋即事

落拓居官儘放慵興來行坐一枯筇尋花晚出風前

逕採藥時登雨後峯經卷有心空在案印囊無事不
開封公餘日飽清閑味誰識身為食土傭

老子中年頗好奇一麾江海任清羸世間人事不如
意官裡簿書無了時閑愛樹陰移席穩靜憐山色下
簾遲民言太守嫌多取收拾風光盡入詩

駕鶴樓中四月寒旅情官况剝淒酸澆愁有地杯心
凸抱病無端帶眼寬千里烟塵頻跋馬一城風雨倦
憑欄團蒲宴坐渾閑寂唯把真經好細看

雪雲東北杜關防特地溪山自一方天外片帆來國
鳥樹頭殘日見淮陽身閑慣作魚蝦侶事至愁看鴈

鵝行報道南川新水漲
篋輿時復下龍堂雪雲嶺名

駕鶴樓次韻

滿目城池氣槩中
客來登眺倚春空
蒼虛早納東溟日
野濶遙通北漠風
山近白雲偏覺爽
樓高黃鶴欲爭雄
月明更起輕舟興
烟水微茫古押戎輿地勝覽鄭樵題詠

日回首押戎殊不遠輕舟又載月明迴押戎即津名白雲山號

遇友生歸嶺東

朝來喜子着人衣
忽謾逢君叩我扉
蒲薦竹床談未了
一筇還向海雲歸

李兵使用淳挽

北門初解鑰
墮地將星忙
戎虜春江赤
塵沙晝日黃
盛名新汗竹
遺愛舊甘棠
一掬交親淚
傷心大樹傍
客館舊基有
葵花正開

荆棘叢邊一朶香
可憐孤艷在遐荒
雖然未肯同凡卉
猶有丹心向大陽

以迎 命往還南山驛

侵晨跨馬出郊墟
打飯南山日上初
乍覺清風來攬轡
還看好雨恰隨車
涼聲滿樹敲蒸後
喜氣連村苦旱餘
歸路小兒爭拍手
使君行色野僧如

新監司到界口占

使節翩翩下朔郵風雲萬里馬前隨威聲遠歷黃龍
塞號令新張白鵲旗山有東西兼將相道無南北控
民夷老夫此日猶思奮踏破王庭飲月支

喜雨

時久旱六月二十五日為文
禱祀于黃龍山即日大雨

祀罷黃龍曉天教快雨來白波生廢隴青意返枯荻
喜氣村村競歡謠口口感神功知造物太守敢言才

謾成

脫略紅塵萬念空小軒孤倚水雲中歸來未學潯陽
客得失甘從塞上翁閑引短筇邀野老倦移新菊課
山童悠然一枕羲皇夢過午初醒北牖風

即事

席門深掩斷經過衙罷閑情寄薜蘿日午蟬聲呼夢
覺正看遊蟻上南柯

謾書

樹裡禽聲隔屋聞郡齋終日絕塵紛憑軒坐見南川
雨倚枕眠和北嶺雲簾壓海牛風乍動穗殘金鴨火
猶熏箇中長物符兼印休道龍鐘是使君

偶詠

縹緲芙蓉海上臺一官高卧小蓬萊龍堂落日烏啼
盡鶴浦新秋鴈帶回山色送青當客眼月華分白入

吾杯簿書不礙吟詩興誰識風流謝朓才

歸興

山川蓬島北天地雪雲東製錦才非長衝星氣自雄
折腰憐斗米便面耐西風多少思歸興南飛有早鴻

秋陰

滿地愁陰掃未開病懷孤寂怯登臺秋驚旅榻青梧
落雨沒官橋碧海翅飢鴈帖雲成陣去暗蛩吟砌入
詩來燒香盡日無餘事頭上流光不管催

吏役

青衫供吏役白首愧朝簪世態雲翻覆人情雨舊今

開懷山鳥語得句砌蛩吟更把瑤琴弄誰知千古心

壯心

一麾荒郡足風烟鄉國山川落鴈邊身跨土牛留海
角夢歸金馬上花磚天涯顏鬢今霜雪塞外干戈幾
歲年自恨壯心猶未試匣中空吼老龍泉

登州紀事五百五十言

登州地險艱嶺海之中間柰溟橫作帶鐵峽擘成關
鳥道上青空南北一線通江黃接近界風俗雜山戎
民居叢棘裡百里無一二田耕少所收土瘠沒生理
天寒早霜雪徃徃禾未熟去年秋失稔甌石空無蓄

今年夏甚旱蘊隆地皆赤靈淵禱甘澤槁苗方再活
 七月十九夜大雨狂如瀉猱颺振屋瓦木拔山盡赭
 海溢水入城彌漫遍四野禾穀亂隨流泥沙沒田疇
 溺者十四五泚泚生魚頭飛走皆漂蕩堆積比山丘
 馬牛鷄犬山禽野獸水族之類亦皆漂死堆積於水渚
 山崩岸亦塌川原搥反覆有如鴻濛初天地將改闢又如共工氏怒觸天柱
 折室廬蕩無存十戶纔一脫蕭條四境內如經喪亂
 酷僵尸滿巨港老弱携且哭哭聲上徹天風雲為變
 色故老泣相語此灾無前古哀哀不忍聞念之腸欲
 腐西成望已絕我民何所食民既不得活邦本恐將

天意本難料變生應有召上有 仁聖君翼翼文
 心小斯民亦非辜奈何天不吊兵火十年後北虜禍
 仍構三月戰潼關堅城終不守五月入窮髮千兵半
 流血邊圉日孤危賊勢愈猖獗戍卒坐待哺防秋事
 轉急盡發閭左兵遠輸嶺南粟舳艫海中銜蹄踵道
 上接行齋又居送八路共騷動無兵可更換無粟可
 繼供點丁及三尺捕亡窮一族可憐石壕村生離與
 死別使者日相望誅求星火迫婦子困啼傳丁壯疲
 力役鞭笞耐楚毒身上無完肉棄家竄深谷延命且
 晷刻豈意休明時生靈至此極嗟余受牛羊立視寧

忍想當事俱未辦
醫民顧何策
嗚呼復嗚呼
歎息重歎息
我欲問天公
天公聽若聾
我欲訴真宰
真宰亦不聽
作圖效鄭俠
將期叩閭闔
出位固有罪
堂堂又遠隔
所恃吾王心
光明如白日照
遍鄩屋
氓從今得蘇歇

水災後道中紀所見

大災無後亦無前
衢路川原盡變遷
方割水橫堯帝世
不周山裂女媧天
兒腰短銜收遺棄
婦手空筐泣廢田
口腹未充秋稅促
吾民何計過今年

即事

旅遊驚節序
愁病坐相仍
採藥憑山叟
煎茶倩野僧
草間虫泣露
窓下鼠窺燈
多以酸寒味
秋來一倍增

登鶴城

孤城直壓白雲隈
天作重關石作臺
西崦夕陽鴉背盡
北陵秋色鴈邊來
山橫韎鞞平如掌
海接蓬萊小似杯
好是登臨佳節近
任從歸騎莫相催

贈李光斗無別張廣文還鄉

交契初從妙歲來
襟期到老兩無猜
十年萬事雙蓬鬢
千里殊方一酒杯
薄宦繫人今海嶠
倦遊憐子久塵埃
分携又是秋風後
張翰扁舟羨獨迴

重九

一秋無興事幽探向老羈懷轉不堪山菊映衣黃欲
深岸楓當面赤疑酣愁邊令節逢重九病裡深盃負
兩三却憶去年高會處西風吹帽洛城南

德源

行盡關河晚興濃古城烟樹錦千重天陰欲雨雲愁
色野靜無風海斂空中澤夜寒號鴈驚大津秋落露
魚龍憑軒坐愛前山好辜負登臨第一峯

次定平板上韻

鞍馬今關外山川古沛中黃花愁夕雨烏帽怯西風

旅鬢邊霜冷鄉情海月空歸田嗟已晚製錦愧非工

其二

居多遠遊感况在客窓中疊嶂秋無月踈櫺夜有風
路穿關柳迥天入磧雲空物色吟難盡雕鏤費化工

又次絕句韻

碧城嵐樹晚毵毵指點仙山海上三摺枕竹床成小
夢喚醒身世大槐南

定平試院即事

聖代文風遍嶺陬青衿濟濟斗庭幽露寒丹桂方圓
夜雨濕黃花未老秋三級漸看燒鯉尾一鳴誰辨占

龍頭艱危得士今尤急要取賢良應上求

宿草原郵舍

蕭洒新茅宇荒涼古草原
疎松編作架老柳插為門
塞近霜餘早山高日易昏
竹林詩酒處遺跡暗銷魂

伯父昔為察訪季父為監
司有題詠故未句及之

途中

秋懷悄悄自堪傷
客枕還驚五夜霜
世路兩肱三折
慣光陰十指一彈忙
江山巧作丹青面
草木濃成錦
繡粧莫道行裝太淡泊
剩將詩句富奚囊

文川德源地境兩堠

兩箇路傍立儼如相對揖
白而且長身無衣亦無笠
問道若指掌分明里
幾十作俑自何季
飽經風雨濕
憶在喪亂中紛紛棄城邑
爾獨守信地確然堅
所執
論功可茅土嗟哉賞不及
至今棄道周無人與收拾
摩挲感余懷臨風一於悵
寄語往來者須將此為法
即事

西風吹老傲霜枝
搖落東籬九月時
鎖斷重門人不
到一簾秋意暗蛩知

送金判官叔度赴鏡城

病懷元易感天末
又分襟落日臨關
迥衝風捲塞陰

北來青瑣夢南望白雲心努力須行李邊城雪正深
其二

壯遊男子志慣別故人顏草木三秋後塵沙萬里間
眼青唯驛吏頭白更關山直待羗胡盡班超始乞還

叔度曾為高山
察訪故第三云

自德源還任途中

驛程衰草暗江關行盡天涯雨後山遙望鶴城烟樹
裡夕陽離落盡圖間

十月十三日雪甚

一夜孤城雨雪多冷烟離落幾人家北窓踈竹迷無

影東閣新梅誤有花求食野雞呼粥粥失巢山鵲語
杳杳吏民不到門猶掩木守今朝放早衙

浪城

地形中折海門迴戶戶柴扉面水開忽覺風頭腥裂
鼻隔船人有賣魚來

鶴浦

浦口沙村浸海濤棘籬寒雨晚蕭騷居人共說干戈
苦漁戶今年半在逃

題靖節集

餓死首陽客歸來彭澤翁綱常萬世重心事二人同

凜烈指生際沉冥托酒中採薇與採菊今古一清風

即事

夢罷黃紬鼓報衙簾前隱映月初斜凌晨未覺寒威
重手拓西窓看雪花

偶出

千林夜雪白皚皚歲晏池臺客不來莫恠使君扶病
出水邊疑有早梅開

庚申夜

歲暮遠為客天涯愁病身流年將丙午守夜又庚申
直道居常慕孤燈卧獨親三彭何足怕心事在蒼旻

春半

晚從關外借州麾管得溪山事最奇海草再青知客
久顛毛一白感年衰風雲磧北來籌策花柳城南引
夢思淹病忽驚春又半故園何日定歸期

即事

形勝黃雲北神仙碧海西境深巢水鶴林僻戲山雞
世事從花笑詩情被竹迷經旬無客到知己獨青藜

漫書

五馬為州鎮北關星霜倏忽二年間良辰久病妨吟
興暮境衰痕驗客顏愁外烟花春入塞夢中蘿月夜

還山東湖有地堪棲遯無限滄波白鳥閑

辭病將
適故云

遇雨留高山館適任後

再宿高郵夜初辭北海春花如待客山雨欲留人
世事違心久風光觸眼新淵明有田里比我不為貧

銀溪驛

峽雨初晴三月時背岩籬落得春遲山從鐵嶺天方
豁路人銀溪水益奇楊柳似愁還似夢桃花如笑又
如癡今來空被奚童怪閱盡囊中無一詩

宿生昌村

紅杏花飛野店香一川中走碧羅長孤村戒盜吹宵

角古屋懸燈耿曉床夢破寒雞聲裡月愁添倦客鬢
邊霜催裝更向豐田去傍路青蕪映綠楊

過永平村

一村居僻白雲西萬壑千岩似會稽芳草細分前日
路落花浮出去年溪青林雨氣衣腰濕赤岸風光馬
首迷何許流鶯如識面數聲來向柳邊啼

白雲
山名

稼山過白楊根宅并序

前赴鶴城過兄一宿款款言笑音尚在耳而
曾未浹歲人事遽變豈意生別便成死別慟
我慟我曳病歸來情闕莫拜但寄淚松檟恨

亦如何

去來同此路人事異存亡握手前年別傷心逝水忙
新阡草未宿哀壑日無光笛裡山陽淚東風洒白楊

到京寓西江

白首青雲意已闌宦遊蹤跡一生寒無端驚破槐陰
夢來把烟江舊釣竿

次朱 天使詠物詩十三首

美人手

清晨結束疊輕羅罷綉停針怨別多春暖巧裁雲碧
袖夜寒愁擲錦機梭金釵懶整閑斜燕玉指頻呵怯

畫蛾頓翠歸來香滿握瑤琴時弄動纖歌

和蘇長公雪韻

千林白色沒洪纖雪意通宵未解嚴壓砌幻成龍尾
玉投巖工作虎形盤吟來柳絮飄春岸夢後梅花落
曉簷樓上美人偏怕冷新愁一夜集眉尖

城上頑雲鎖暝鴉龍公產雪轉天車樓臺曉掛玲瓏
月苑樹春粧富貴花剩把詩情輸灞岸旋將喜氣屬
田家應知高處寒逾甚九鑰關門凍夜叉

瓊屑篩空萬玉纖撲窓寒勢曉來嚴庭前乍覺梅飄
粉戶外俄驚竹洒鹽風力借威欺敗絮月華連白護

虛簷裁詩欲賀豐年瑞呵凍剛愁退筆尖
踈林漠漠壓啼鴉積素微茫眩日車皓鶴闔空初散
羽瑤姬剪水巧成花寒光宇宙銀千里霽色江城玉
萬家水閣硯池詩筆澁苦吟清夜手成叉

雨中新草

池塘春夢乍初回細草如絲漸雜苔天遣陽和蘇暈
物雨將生意遍根芽隴頭牧笛三聲弄堤上羅裙一
色裁好向瀟溪溪畔翠萋萋長映讀書臺

勾萌初擢碧纖纖陽氣知從地底潛痕帶暗烟呈迥
野色添新雨到空簾江頭暖候春先覺院外微風晚

正恬怡悵王孫歸未得剩教離恨淚頻沾

砧聲

金井飛霜昨夜秋拭將砧杵擣邊愁聲和塞鴈兼宵
拆響雜隣鷄到曉籌羌笛夢魂空外斷朔雲歸路望
中悠征衣卷疊無人見落月依依半隱樓

新柳

嫩烟偷着水邊枝好事東君似有期拂地條輕疑舞
懶當樓葉短妬粧遲章臺暖日搖金線御沼寒水弄
碧澌為近玉階偏雨露一春消息最先知

並蒂蓮

戲剝波神欲闔竒故將雙萼漾清漪同心倬妁齊開
慶並帶嬌嬌競吐時月下生香爭逞態雨中含淚各
多姿佳人見爾應相妬莫把妍粧近玉卮

玉河水泮

葭管噓回地底春御河新水浩滄津陽和有象寒初
解德澤無方氣自勻風動玉龍鱗甲散浪搖銀漢轂
羅新宸居咫尺恩波闊涵泳從知荷聖仁
氣從泉脉轉三陽曲渚輕水細琢章鉛汞夜鎔銀閃
閃玦環朝瀉玉鏘鏘風來漸見靴紋皺日照翻疑錦
段張剛喜九重多瑞色五雲新護鳳池傍

鴻鴈來賓

秋晚金河白草深朔風吹過見陽禽數行影落霜前
樹萬戶聲催月下砧冬暖生涯湘水岸夜寒棲息荻
花林來時莫近紗窓畔無限蛾眉憶遠心

跋

空中之音耶相中之色耶其源乎風耶其源乎雅
耶登州之作直與春陵一篇并駕於千古之上吾
於是始知芝峯老子立幟之高也真所謂不二門
中正法眼藏豈野狐小品可等論也不覺三歎而
題之丙午新秋玄翁書

芝峯先生集卷之十二

芝峯先生集卷之十三

洪陽錄

洪陽洪州別名起戊申正月止巳酉四月

正月二十日辭朝後拜墓有感

荒原來展掃宿草又新年苦淚沾山雪悲聲替野泉
白楊風靜晝蒼檜雨晴天再拜澆觴罷徘徊夕照前

渡漢江二首

時鑿冰行舟

江冰半破未全融來往纔從線路通文鷁翼浮牽楫
捐玉龍鱗散鑿冲冲帆橫博望槎邊海座壓馮夷水
底宮天上人間同一漢恍然身世似騰空

正月寒漸下漢陽春流拍岸濟無梁銀河路近槎堪

到碧海潮通葦欲杭卸馬挈舟百丈壯鑿冰開道五
丁忙飄然快我南歸興一笑江神共舉觴

沙坪路中遇洪德公馬上叙別

立馬東西路離人去住情相逢兩無語江外夕陽明
路傍石彌勒

石佛頑然立道周無言慣閱古今秋看他捧腹知何
事似笑人生不自休

板橋道中

山色鞭頭出林烟馬首分板橋人舊跡冰澗水新紋
野變將春柳天垂欲雨雲前村知隔岸樹裡午雞聞

宿板橋村

一舍經三宿遲遲去國心鍾聲長樂遠雲氣未央深
拙宦薪仍積迷途陸已沉終南看漸杳日落漢江陰
板橋遇雨留一宿房屋狹陋鬱鬱不能堪

板橋一夜雨霏霏故作寒行子苦濡滯曉起仍長歎
蝸廬僅庇身打頭頭不冠窓暗黑如凍屋低坐難安
薪濕火不起茅漏床無乾沉陰同晝晦嘔噎廢朝餐
時固有屯秦聖賢初等者顏回處陋巷至樂在瓢簞
此心苟坦蕩室小猶覺寬寧將一日戚損我平生歡
長歌送今夕浩然天地間

旅院道中

天教小雨淨行塵
漏得江梅分外春
水沒鞍韉泥沒膝
一番詩興馬頭新

孤山道中

將自孤山院徑入水城

晴鳩喚罷雨鳩呼
林際烟嵐澹欲無
借問前頭歧路處
一眉雲外晚山孤

抵水城農舍

十載一歸來柴門依舊開
砌添今日第墻老昔年梅
野叟迎相喜村童見不猜
陶然成酌酹隨意卧莓苔
二十七日甚寒

一雨勤寒甚冬威仍作驕
霜封春後尾冰斷夜來橋
柳怯愁眉感花羞淚臉消
天心本無定暄暖不終朝

平澤

野火燒春盡青蕪得雨齊
澤深無鴈到村午有雞啼
浦口吞潮大山腰帶霧低
遙看茅屋處楊柳小橋西

牙山道中

黃茅十里度平原
山豁西南瞰海門
日午腥烟生浦口
買魚炊飯隔林村

牙山

百里牙山縣孤城枕海隈
人烟依浦淑蜃氣疊樓臺

雪點梅腮破風吹柳眼開絃歌知茂宰端有割雞才

道中即事

春泥汨汨野冥冥睡着轎中未醒忽覺新詩生兩
眼晚雲開送好山青

上官日口占并序

歲乙酉知事叔父為牧使時余以新及第來
觀至今二十四年余又為是州故感而賦之
折桂青年太劇狂經過此地北星霜重逢父老非生
面却望山川是故鄉司馬舊為印縣客買臣今得會
稽章居人指點驚衰醜不似當時馬上郎作馮子

合德道中

行度溪橋第幾村黃茅盡處更平原長烟一面青山
豁知有人家傍海門

即事

花柳洪陽地風烟海畔村對山思五聖尋寺禮三尊
雨自龍頭至雲從鳳首昏時行南陌上閑聽老農言

五聖山名三尊寺名龍
頭地名鳳首亦山名

回途即事

簿領叢中日辨忙暫隨春事過漁梁年華荏苒行將
暮世故侵尋坐欲狂海草始生風着力山花纔吐雨

催粧肩輿穩載吟詩興未覺村程十里長

龍頭道中

誰家住在小橋東
牆外山茶掩映紅
一徑斜穿垂柳底
竹輿歸去畫圖中

雨後

一雨三三後
新晴物有華
浦深魚世界
池漲鷺生涯
海岸蒲初筍
山墻杏已花
村田多喜氣
笑響隔雲家

路中見杜鵑花滿開

去時花未開
來時花盡開
山中昨夜雨
應是為花催

其二

昨夜杜鵑啼
今朝杜鵑發
應知枝上花
染得口中血

次交代李子敏留題四達亭韻

永日閑吟壁裏詩
烟如水玉照襟期
高名不用文為記
盛事行看口作碑
天上大蘇奎宿煥
人間老鄭鷓

鵠奇追蹤往昔吾
何敢惟幸交承得
共時公詩有曰小技却慙

非大手謾教人比鄭蘇時蓋蘇世讓鄭士龍曾代為本州故云

庭際有櫻桃花盛開未三日還落有感

花事無三日
人生少百年
盛衰同一理
浮世更堪憐

四達亭即事

彭澤春歸客未歸
簿書叢裏宿心違
公餘偶作江湖

夢猶逐沙鷗上釣磯
吏散庭除坐嘯長
幽軒近水易生涼
三杯吸盡梨花
月寫出新詩字字香
山墻日上未蜂衙
柳下踈簾滴露華
休怪使君春早起
愛憑危檻賞殘花
重簾日午展緜波
曲渚陰陰柳影多
欲識其中奇絕處
也須乘雨看新荷

病中謾成

城柳陰陰翠作幢
畫簷飛燕語雙雙
深春卧病無清興
閑却梨花月一窓

題三節灘并序

三節即洪正致祥妻趙氏與其婦李氏李氏之母鄭氏於壬辰倭變避亂揚根地賊逼不污相携赴水而死鄉人名之曰三節灘

節婦一為貴高門今見三亭亭霜後栢烈烈女中男
特筆千秋史豐碑萬口談當時偷活輩到此面應慙
初夏

一雨初晴四月時
薔薇架下午陰移
微風不動軒窓靜
卧見殘紅點綠池

即事二首

洪陽館裏好池臺簿領叢邊撥病回開牖引將涼氣
入捲簾邀却晚山來題詩古壁風生筆命酒幽軒月
滿杯興罷蕭然還坐嘯此身渾似卧蓬萊

東軒公退後幽事晚還新羨酒傾三亥嘉蔬備五辛
忘携山鳥狎索句野僧親不省身為吏依然物外人

寄黃同知思叔金韓山景仁二首

時居扶餘
白馬江上

半生榮宦笑支離白首為州亦太癡九十日春多帶
病尋常年事捻吟詩江山與我有深契世故駘人無
已時遙羨舊游新卜筭石灘烟雨共栖遲

叔度久難見况兼吾景仁青山新杖屨白眼舊風塵

海月迎殘曙巖花落暮春應知芳草徑來往雨閑人

南館

南館清幽景最奇一軒如水靜相宜烟開柳幄圍雕
檻雨鑄荷錢點小池吟愛遠山褰箔早坐憐新月閉
窓遲閑來睡着蒲團上下喜微風拂面吹

雜詠

寒社芝峯老鈴齋晝睡長病雖同汲黯心豈薄淮陽
事過惟高枕身慵不下堂時危闕百慮閑坐一商量

山亭即事二首

燕子風恬日正遲綠槐陰畔畫簷垂騷人手拓西窓

坐看到閑雲作雨時

小閣無塵午更清
海棠花外嫩涼生
晚來偷倚闌干
曲聽盡流鶯雨後聲

贈太鑑上人

願我非韓愈逢僧是太顛
洪陽今刺史海上舊參禪
片月飛笻外閑雲坐榻邊
留詩珍重意却怕有人傳

午睡

清切軒窗面水開
晚涼荷氣護樓臺
微風海上初黃
雀小雨庭前欲熟梅
池暖魚兒成隊出
林晴燕子引雛來
棠陰一枕江南夢
却被流鶯喚得回

五月風曰黃雀雨曰

梅熟

雨荷

水府靈仙宴未闌
夜深環珮響珊珊
酒酣戲劇誇珍寶
散擲明珠綠玉盤

永日

永日山亭好身閑
事事幽檻前
花富貴池畔柳風流
樹密頻移榻山晴自入樓
誰知彭澤令高卧北窓秋

大興道中

日午晴林海氣昏
石橋風定水聲喧
馬行綠樹陰邊
路人語青山影裏
村媪推笮隨獨犬
耕翁上隴戲

諸孫望中野色真成畫畧斷黃雲一半痕

古城嶺

夕陽陰靄半邊開林色依微石磴回此去前村知近
海濕雲駘雨度溪來

宿惟鳩村

小屋臨溪住重雲濕翠微客窓聞杜宇中夜倍思歸

布穀

布穀爾何苦催春處處鳴田家識時候東作冀西成
今年百役重地枯仍未耕無穀可布種種之亦不生
何如變爾舌學得喚雨聲不然且緘口飛下桑田晴

泥田道中

一徑緣崖水四圍岸邊人似鏡中歸桃源定在林深
處雲外孤村隱翠微

道過一洞泉石甚羨喜成一絕

石橋斜跨小溪流特地風光古洞幽怪底山川如識
面分明昨夜夢中遊

過扶餘

綠樹扶餘道輕風不起沙臺空惟有月岩古已無花
白馬潮頭壯青山浦外多千年百濟國往事渺烟波

銀山

午憇銀山驛荒郊四望賒壞墻蛇作穴空院鳥為家
蚕老桑無葉蜂喧菜有花槐陰成小睡西日下南柯
溪石
卸馬臨溪坐夕暉綠楊陰底小苔磯年來自信忘機
熟魚不驚人鳥不飛

道中

峽中烟火自成村竹下誰家半掩門流水好山如畫
裏此間無處不桃源

宿青陽溪舍次板上韻

斗屋蕭條倚樹頭怡神亦足散清愁寒聲竟夜醒人

耳為是軒窓枕碧流

憫旱二首

旱毋滋為虐灾今占所無地乾缺馬卧田爍麥人懼
勿謂天難格相孚理不誣那將方寸雨一洗萬民枯

其二

出守洪陽日端逢大旱年國憂時仰屋人事夜觀天
亂久宜回泰治新要急賢猶聞霖雨作流澤庶窮壤
時聞完平鰲
城作相故云

車復元來訪次其韻

故人來叩雨中門倒屣情深酒一尊說劍氣高湖海

夜揮毫色動郡齋昏詞如沈宋堪追步格到蘇黃不入論
剛喜清言能起我盛唐風雅共淵源
西塞聯槎夢已涼五年青眼又洪陽風塵治郡功名
薄海嶽論文意氣長猶喜筆鋒垂老健却驚愁髮未
秋霜乾坤自是容吾輩合着樽前一放狂

夜雨吟

爽氣侵燈暗銀屏小夢空隔窓知有雨聲在碧梧東
車復元以製述官赴 召詩以為別三首

奇才合被 聖君憐起廢江湖未暮年鵬擊三千初
六月龍飛九五正中天星槎舊夢銀河上雨露新恩

白日邊老守洪陽艱繫久却瞻行色似登仙

流落多年不定栖客亭今日又分携匣中風雨衝星
劍筆下波濤掣海鯢詩律直凌唐始盛賦詞雄駕漢
東西龍灣物色元相待應費騷人再品題

數月欣聞所不聞旋看筆底掃千軍風塵有眼誰知
已天地無情欲妬君玄豹久藏南谷雨卧龍新起大
湖雲臨歧未敢牽行袂惜別還成勸駕文

四達亭芙蓉盛開與客會翫席上口占

朱華開遍小池塘荷氣侵入滿座香
弄節水仙子翠蓋並頭溪女萬紅妝
天將晚色供詩眼雲送輕陰落

酒觴須信此亭真四達從他面面引風涼

詠白蓮用前韻

一朵亭亭出碧塘好風時拂水生香嬋娟玉女雲中
貌淺淡星娥月裏教素質故應矜雪艷仙姿元不暈
霞觴嫣然欲吐還羞澁似怯瑤臺五夜涼

詠紅蓮

紅衣簇簇映回塘國色還能擅國香霞染絳唇開笑
靨雨沾朱臉學啼妝石家金谷全鋪錦王母瑤池乍
御觴最怕西風偏妬艷等臺須為避新涼

紅蓮滿池白蓮一朵獨秀出異甚次人韻

水宮新落廣寒亭羽蓋聯翩集衆靈宴罷酒光皆入
面玉京仙子耐偏醒

蓮花經雨落去次前韻

雨打荷花水滿塘羣仙初罷舞山香凋殘綠女樓前
色零落楊妃路上教惟有翠團留羽蓋更無紅艷映
壺觴冰盤雪藕還堪薦却喜先秋一味涼

謾成

半世藏身翰墨中宦情牢落郡齋空池臺乍過荷邊
雨枕簟初生竹外風白水晴分平野北青山暮出亂
雲東都將物色歸吟筆剩覺新詩勝畫工

苦熱

垂簷矮屋深於甑最苦炎蒸是病夫渴肺生塵思玉
井煩心貯火想冰壺難逃大地三庚暑未借真仙六
癸符午枕暫時成倦睡九霄風露夢清都

八峯山

地志曰八峯山多奇石
世所謂小金剛山云

八箇峯巒勢抻天夸娥一一費雕鐫奇觀不必多為
勝休道金剛萬二千

贈山中僧

老宿年來不出山石床長共白雲閑欲知相對忘言
意吏政禪心自一般

龍鳳寺

客來僧殿古苔沒佛庭空鳥跡天書怪蝸延壁畫工
石峯高障日山木冷吟風為山彌道吾將老此中

次龍鳳寺板上韻

清切珠庭近紫宮八峯如束倚層空初疑洞裏無僧
住却喜林間有路通龍送夜吟雙磬雨鶴驚秋夢萬
松風山靈定恠分留少收拾烟霞滿袖中

次蓮谷兄韻

床頭閱盡古今書偷倚雕闌晚興餘時覺風雷生水
面此間應有化龍魚

省事無心作報書北窓孤嘯午眠餘今年懶比前年
甚都把陳篇飽壁魚

丈夫安用局詩言白首摧殘壯氣餘快劍欲磨滄海
水斫平桑島膾鯨魚

一麾

一麾隨分送殘年治郡無能俸錢菊對陶潛空醉
興山供謝朓幾詩篇階前翠竹兒童馬池畔青蒲太
守鞭衙罷深齋惟靜息不妨呼作小神仙

和車復元七夕詞

金盤玉果媚新涼百子樓前夜欲霜莫信天孫能與

巧機絲猶未繫牛郎

車復元以詩百首相贈喜成一律酬之

溢眼驪珠箇箇奇百篇何幸慰遙思惟君筆下能無
敵底處人間更有詩誰識妙音多伯子祗嗟今世少
鐘期想看把酒揮毫處白日風雷起硯池

秋懷

竹外虛亭暑氣闌銀塘一夜藕花殘烟開圖畫青山
活露洗精神白月寒詩力得秋偏覺健病懷逢酒未
成歡西風吹我思歸興夢裏扁舟世界寬

哭韓秀才二首并序

秀才名昭一即柳川益之之胤也聰秀有才
器宇夙成人嘖嘖以遠到期而不幸早殞加
一子安之歲減九長吉之年蘭茝中途墜埋
黃壤嗚呼勸我抑柳川公居太夫人憂僅踰
月間荐遭斯酷天之祐善之道何蹠盤耶余
於是又竊疑之而竊痛也

可念韓公子清標迥出塵人間真鸞鷲天上小麒麟
雨打萱花夕風摧玉樹春德門仍慘禍吾欲問蒼旻

其二

生之非偶爾命矣奈如斯瑞穴摧丹翮名家失白眉

室中纔有婦身後更無兒行路爭舍慟何論骨肉悲

即景

宦遊驚節序秋思倚胡床帶雨溪雲黑啣山海日黃
鳥歸催暝色虫語報新涼愧讀淵明賦田園久就荒

題洪陽雜錄

襟帶山河氣象雄地靈從昔說茲洪堂空學士雙梅
月祠掩將軍大樹風千古人才金赤洞一時名宦鄭
蘇公欲題新句傳遺躅却愧凝毫思未工

有祠皆本州人兩世傳金洞之文赤洞之
武故云鄭湖陰蘇陽谷曾任是州者也

答車復元寄書及詩

頻遞郵筒洗鬱陶詩追大雅賦離騷人間漫有談天
衍世上元無相馬臯千里風塵雙劍缺百年湖海一
綈袍休將正法評流俗造物從來妬我曹

憶水城農墅

陶令田園久已蕪水城南畔禿城隅階羅醜石新三
品庭立寒松古大夫金谷秋雲吟外碧清淮晚樹夢
中孤春來手種西墻竹借問奚童護得無金谷清淮
皆其地

大興道中

十里任城路崎嶇石嶂間晴林今日眼衰菊暮年顏
半赤霜前樹微青霧裏山歸程應更好且帶夕陽還

洪陽雜詠

前營劔戟列森森妖孽當時坐就禽地自三韓天作
塹城從百濟海為襟雲開西岳千秋月日照東川萬
頃金更是鑿輿曾駐處至今遺澤在人心本洲為前
營妖孽指

李夢鶴也月山在西金
川在東故第三聯云

遣懷

海國秋將老閑齋掩席門霜鴻初有信篋扇已無恩
晚興詩增藁新愁鬢帶痕幽懷悄誰語萬慮到黃昏

追贈梁海羨以製述官赴都

多君才調自超羣詞學江寧筆右軍久訝卑棲來下

邑旋看插翼上層雲揮杯郡閣湖山動跋馬郵亭海
日曛相別一秋詩社冷夜窓誰與更論文

夜雨

蓮葉三更海雨鳴草根虫語濕無聲西山爽氣看應
好準擬開窓待晚晴

前日再遊公山登利仁驛樓追記其事

十年行色錦江頭紅樹青山夢裏秋猶憶當時驛南
路翠屏斜日獨登樓

翠屏即驛樓名

遣興

搖落庭梧葉盡乾倦遊懷抱歲時闌烟描翠黛千峯

活露泣紅衣萬柄寒雄劍埋塵猶欲吼陰符在篋已
休看秋來漫有歸田興五馬風霜未掛冠

崔將軍祠并序

將軍名瑩墓在洪州世傳將軍死而顯聖鄉
人立祠至今禱祀之余為此詩第二日夢一
丈夫形極魁梧謂余曰見君詩多喜多喜前
日之賊退皆吾功也因倏然而逝覺後甚驚
異無乃將軍之靈尚有未泯者耶第賊退之
言不能了解本州曩者倭寇犯境而旋退逆
孽迫城而自敗豈此之謂歟可怪也已

崔將軍真壯士天為吾東生我地手提一劍血羣兇
左馘紅巾右黑齒旌旗鴨綠無回路東市衣冠眼猶
怒魂歸赤洞鄉祠開猛氣如存食故土死後還能禍
福人至今奔走洪陽民洪陽之民祀將軍金支翠纛
千千春迎神彤纓伐鼉鼓醜酒炮牲野巫舞林風吹
散紙錢灰白日徃徃神靈雨丹青剝落鬼畫嘯錢衣
蝕盡苔花曉一時之功萬古冤松岳蒼蒼月山老

憶龍鳳舊遊

第一山龍鳳巖巒翠幾層暮鍾知有寺空院訝無僧
佛坐黃金地禪窓白日燈只今中夜夢和月度溪藤

朴仲悅來訪留贈一詩喜而賦之

天涯逢舊雨日午始開門乍對真如夢相看久不言
急呼樽裡酒先檢鬢邊痕別後留瓊玖沉吟倚夕軒

飲茶六言

不武不文火候非絲非竹松聲啜罷盧仝七椀飄然
身上太清

九月八日雨

秋雨悒悒打席門菊花籬外又黃昏無端減却騷人
興寥落重陽白酒樽

重陽二首

海霧纔成雨城雲欲護霜窮愁端得老客意最先涼
鬢有三秋白花無九日黃佳辰誰共醉合眼送斜陽
其二
寒意悽悽小雨催天涯不覺歲時迴秋容未老人先
老笑口難開菊自開浮世幾多重九日旅遊孤負兩
三杯只今鄉國龍山會誰是登高作賦才

漫成

曲曲闌干面面通碧城西畔小池東蕭騷落葉三更
雨顛倒殘荷一夜風山色送詩來眼底月華隨酒入
杯中天公餉我無邊景贏得清秋筆力雄

九月十四日夜坐即事

病客秋無寐虫聲故近床人生空萬事時序已重陽
霽月詩中白寒花酒裏香愁來聊倚柱燈影夜窓涼

曉角

河漢微明鴈度時碧窓寒意布衾知數聲殘角江城
曉長向騷人夢裡吹

華清宮詞

羯鼓聲中夜宴開玉樓春艷白雲杯君王醉倚遊仙
枕不愛商岩夢楚臺

題辛兵使雲水亭

知公性癖在烟蘿歲暮田園樂事多身逐閑雲初返
宙心同止水不生波門前碧柳陶潛逕屋裡青山謝
朶家他日扁舟可乘興溪亭一擬雪中過

兵使公遠
歸故云

即夜

落木因風語寒花帶露啼思鄉今夜夢月白海雲西

寮倒進退格

寮倒洪陽牧沉冥簿領間水雲牽興遠湖雨入詩寒
白雪今人耳紅塵舊客顏心清仍少事身靜似無官

孤城

孤城秋滿眼搖落晚愁空世事詩篇外年光客枕中

瘴雲晴似雨高樹夜疑風湖海平生氣霜天劍吐虹

憶龍鳳寺次前韻

踏破蒼苔逕靈峯最上層松寒無宿鶴林暝有歸僧
落葉風為帚空堂月作燈清遊長在目一嘯倚枯藤

新雪

天上新成玉樹宮雲斤月斧後羣工紛紛落屑隨風
下粧點人寰一色同

贈刻手僧妙淳

伽椰老上人技妙性還淳剖剗今生業髣緇爾幻身
叨勞刻宋楮思巧斲齊輪何似觀心者居然悟本真

次鹿門五山韻贈冲徽長老

師住桐林深處寺鈴齋為訪使君來陶籬已老霜前
菊謝展初痕雨後苔逸跡偶隨明月出歸心還被白
雲催留詩賸得烟霞色筆底陽春起蟄雷

不見

不見故人久關河重復重夜燈空有夢秋鴈兩無蹤
顏色梅邊月精神雪後峯何時文字會樽酒一從容
伏承沈相國手翰辭意繾綣無任感佩因次上
年所贈詩韻奉謝

台光雖日遠喬嶽每馳思不道鵝毛薄惟嫌鴈足遲

包容公有德眷愛士無飢感戴平生志徒然祝壽眉

其二

霖雨登賢佐蒼生夙望懸五絲重補袞一柱獨擎天
樗櫟材何用江湖地更偏惟思歌盛德金石永流傳

其三

自詫洪陽宰多蒙上相思雄州容懶拙雌閣任棲遲
地瘴身仍病天灾歲屢飢那堪臨暮境萬事集愁眉

其四

漢竹欣重剖羊魚愧未懸眼明黃道日身落白鳩天
潦倒風霜苦生成雨露偏片言猶感幸何況尺書傳

永保亭

危亭俯壓海門空人在蒼茫積氣中秋色磨青銅土
下夜光浮白玉西東鰲頭弱水三千里鵬背長天九
萬風頓覺胸襟清一洗半生遊迹此為雄

長至日同方伯行望宮禮哭臨訖口占

憶昔隨班入紫宸瑤墀齊賀一陽新天涯此日空瞻
拜淚滴荒城雪裏晨

喜冲微來訪題贈塞請

擁褐鈴齋夜青燈對雪眉樓雲眠古堞窓雨響寒枝
細討經中字閑尋素裡詩要觀心性處不語兩相知

雪

誰把銀河作屑來定從仙女手中裁纔看萬鶴庭前
舞已覺千花樹上開塵界應時皆麪市玉京何地不
瑤臺新晴景色尤堪翫摸寫須憑太白才

懶雞詞并序

余在洪陽無鍾漏為畜一雞而雞不鳴天明
後始作一二聲而止因名懶雞詩以嘲之

嗟爾名晨禽風雨不輟音所以舜與跖孜孜同此心
畜爾求爾鳴庶幾警吾懶如何不能晨天明方一喚
爾懶甚於我我懶誰當砭令我懶益懶頽眠日上簷

盥櫛既已廢為善將何從爾性本不爾無乃學我慵
馬以一鳴斥鴈以不鳴烹此間固難審宜爾慎爾聲
欲作懶雞詩還復懶為辭爾我同一懶懶者竟是誰

偶成

四十年来客洪陽一逐臣宦情隨歲減新句得梅詩
短髮渾先雪衰顏更不春消愁將底物唯酒最關身

過無恨城

好是城無恨如何客有愁萬山殘雪裡西日獨登樓
午到蛤田厨馬蹶泥不來日暮不得食飢甚困
睡

十丈春泥馬屢敲喚人林際有茅茨脩然倦倚邯鄲
枕日夕黃梁尚未炊

葛院

葛院尋遺跡荒涼只舊基田疑仇餉處竈憶鍊丹時
暖氣回梅萼晴光變柳絲思人不可見立馬故遲遲

第二聯用葛
伯推川事

宿清淮

月隱清淮夜午天數間茅屋小於船無端滴瀝踈簷
雨驚破騷人倦後眠

清淮夜雪翌朝四野一白

燈火微明古屋幽野雞聲裡曉寒稠青山也似憂時
客一夜東風盡白頭

宿板橋村

重到板橋宿往來前歲人愁懷難過夜衰髮不宜春
喜近長安日行沾九陌塵却驚花柳色雨後一番新
洛下遇車復元來訪贈詩時復元將有龍灣之
行次韻為別

洪陽館裏幾傾樽陳迹猶存四達軒千里衣冠初紫
闕五年魂魄又脩門明時上下方交泰病守西南幸
處坤忽漫相逢還惜別臨歧脉脉兩無言

洪州在西
藥故云

雨後風冽寒甚

東風亦惡劇與雨作寒媒柳澁難開眼梅顰不破腮
水生冰更合山冷雪仍堆我有陽春曲呵將凍筆裁
抱川道中遇一僧云自雪嶽山來

一錫來何所千重雪嶽寒山中知有雨衣濕未全乾
永平

十載牛頭路寒蕪破舊痕烟分橋柳色香返野梅魂
水出重重嶺溪流曲曲村漁舟迷咫尺何處問桃源

水出嶺溪流村
皆永平地也

二月十七日自京還發渡銅雀津

孤鴻初北返五馬再南飛好在長江水秋風我欲歸

果川道中朝霧

春霜厚於雪春霧濃如雨微茫漢南山不辨沙岸樹
飢烏聚寒枝睡鴈依深浦客在此中歸詩情驢背苦
行行問僕夫咫尺恐迷路如何去還來愧却淵明賦
一嘯臨長途天開日欲吐

偶成

北闕南州路更分頻年去國髮絲紛疎材久已為時
棄造物惟應假我文揚子玄言終覆瓿馬卿詞賦謾
凌雲支離薄官非貪祿九死丹心自愛君

還官口占

二月洪陽道東風引我行銅魚還舊綬竹馬赴前盟
攔路兒童笑攀轅父老迎令人顏更厚何似古淵明

己酉三月感懷

三月二日寒食
四日清明節

今朝佳節最堪憐來日清明昨禁烟輕暖輕寒三月
候半晴半雨一春天關城暮色顰楊柳院宇韶光醉
杜鵑老守此時無意緒郡齋蕭索過年年

萬事

萬事雙眉外青春白髮前名場先鷓退暮境已蚕眠
令節杯難把邊虞箭屢傳雄心老尚在一欲勒燕然

即事

昨夜田園夢裏還
竹扉春色暎花關
今朝料理生涯事
水滿前溪雲滿山

時呈病治行故及之

四月十五日以製述官赴 召品官及吏卒出

送于仁厚院席上口占

五馬朝天路殷勤
遠送行深杯非勺
水落日暫班荆
月岳應愁色金灘
亦怨聲院名今可
驗仁厚吏民情

途中口占二首

孤蹤久與世相違
不謂承恩日下歸
驛路初從南國遠
鄉心先逐北雲飛
春霜未落湖中鬢
瘴雨猶沾海

上衣一出脩門驚
歲屢向來知舊也
應稀

玉京歸路馬蹄忙
行盡重湖百里長
海氣沉山成小雨
溪雲擁樹失斜陽
車前細草和詩碧
袖裏清風滿意涼
乍喜終南青逼眼
月城回首漸微茫

葛川

短鞭吟過石橋頭
野稻初青麥未秋
芳草年年漢南路
夕陽長照去來愁

龍仁客舍東池

龍駒縣舍夕陰輕
砌下方塘鏡面平
明月印波波不動
一般心地共澄清

跋 芝峯先生卷後

五言鼻祖於五子之歌七言權輿於茅仙之謠昔人乃以枚叔栢梁當之左矣齊梁間略有律體至於李唐大備律至於唐為千古詩人赤幟三到之說盡矣然有始盛中晚之別後之學者莫不剝鉢搯擢祖述之憲章之然入中晚之堂者尠矣况入始盛之室乎自唐以下無詩久矣生中國而模擬者寥寥尚千載而况於海外之國乎而况於末膚之孤寡者乎然而豪傑之士不待文王者則亦不可厚誣蓋天地之氣得其秀者為人而作文者又

其人之秀也詩又精於言辭而發其秀者也天地之生才無古今殊而才之卓卓者不繫世之污隆若然雖後之學者未必不及古之人歷觀前代史籍庸有可言者吾鯨域有文憲來作者不知幾何而在羅國有若崔孤雲在麗氏有若李相國最其大家其後若牧若陶若圃亦可謂傑然者也我朝尤重文學之士然梅月佔俾外容齋湖陰亦以詩名大譁於一世近者有芝峯李先生最有得於詩先生之詩學盛唐而為也匠心獨妙造語極精深得古詩人鑪錘有若自成一家者然先生之於

詩不可謂不自臻其間奧矣不佞辱從先生游有
十年之雅妄以不佞之知先生望於知不佞也而
相知之不淺淺蓋亦有我洋之指焉先生所作為
詩無慮千首不佞曾已目寓卒業矣今見洪陽以
後詩如千篇一帙尤極研妙益信不佞之知先生
不妄先生當為後進領袖詩特其餘事也世之知
先生者以位不滿德言之然先生齒未及杖於家
官歷踐清貫固不與詩窮者比當此時主盟詞壇
居東壁而秉文衡者微公而誰顧先生之詩世之
知者恐不如不佞之深也故聊書其卷尾以為知

已者之信萬曆己酉七月二日五山車天輅書

芝峯先生集卷之十三

